

南北史合注

欽定四庫全書

南北史合注卷九十

明 李清 撰

魏本紀第四

北史四

世宗宣武皇帝諱洛孝文皇帝第二子母高夫人初夢
為日所逐避于牀下日化為龍繞已數匝寤而驚悸遂
有娠太和七年閏四月生于平城宮二十一年正月丙
申立為皇太子二十三年四月丙午孝文帝崩丁巳太

子即皇帝位大赦諒闇委政宰輔六月乙卯分遣侍臣
巡行州郡問民疾苦考察守令黜陟幽明褒禮名賢戊
辰追尊皇妣曰文昭皇后秋八月戊申遵遺詔孝文皇
帝三夫人已下悉免歸家癸丑增宦臣位一級冬十月
癸未鄧至國王衆舒彭來朝丙戌謁長陵丁酉享太廟
十一月幽州人王惠定聚衆反自稱明法皇帝刺史李
肅捕斬之是歲州鎮十八水飢分遣使者開倉賑恤高
麗國兩遣使朝貢

是歲齊主寶卷永元元年

景明元年春正月辛丑朔日有蝕之壬寅謁長陵乙巳
大赦改元丁未齊豫州刺史裴叔業以壽春內屬二月
戊戌復以彭城王勰為司徒齊將胡松李居士軍屯宛
陳伯之水軍逼壽夏四月丙申司徒彭城王勰車騎將
軍王肅大破之己亥皇弟桃薨五月甲寅北鎮飢遣兼
侍楊播巡擋開倉賑恤六月丙子以司徒彭城王勰為
大司馬秋七月己亥朔日有蝕之齊將陳伯之寇淮南

八月乙酉彭城王勰破伯之于肥口九月齊州人柳世明聚衆反冬十月丁卯朔謁長陵庚寅齊兗二州討世明平之丁亥改授彭城王勰司徒錄尚書事十一月丁巳陽平王願薨是歲州鎮十七大飢分遣使者開倉賑恤高麗吐谷渾等國並遣使朝貢

二年春正月丙申朔謁長陵庚戌帝始親政遵遺詔聽司徒彭城王勰以王歸第進太尉咸陽王禧位太保以司空北海王詳為大將軍錄尚書事丁巳引見羣臣于

太極前殿告以覽政之意壬戌以太保咸陽王禧位太尉以大將軍廣陵王羽為司空分遣大使黜陟幽明二月庚午進宿衛之官位一級甲戌大赦三月乙未朔詔以比年連有軍旅正調之外皆蠲罷辛亥詔尚書申明條制申下諸州刺史速請淹獄壬戌青齊徐兗四州大飢民死者萬餘口是月齊雍州刺史蕭衍奉其南康王寶融為主東赴建業夏五月壬子廣陵王羽薨壬戌太保咸陽王禧謀反賜死六月丁亥考諸州刺史加以黜

陟秋七月癸巳朔日有蝕之乙巳柔然犯塞辛酉大赦
九月丁酉發畿內夫五萬五千人築京師三百二十坊
四旬罷巳亥立皇后于氏乙卯免壽春營戶並隸揚州
冬十一月丙申以驃騎大將軍穆亮為司空丁酉以大
將軍北海王詳為太傅領司徒壬寅改築圓丘于伊水
之陽乙卯仍有事焉十二月齊直後張齊殺其主蕭寶
卷以降蕭衍是歲高麗吐谷渾等國並遣使朝貢
是歲齊和帝中興元年

三年春二月戊寅以旱故詔州郡掩骸骨三月齊建安
王蕭寶夤來奔夏四月詔撫軍將軍李崇討魯陽反蠻
齊主蕭寶融遜位于梁閏四月丁巳司空穆亮卒秋七
月丁巳朔日有蝕之八月癸卯齊江州刺史陳伯之請
降丁卯以前太傅平陽公元丕為三老九月丁巳行幸
鄴丁卯詔使者弔比干墓戊寅閱武于鄴南冬十月庚
子帝躬御弧矢射遠及一里五十步羣臣勒銘于射所
甲辰車駕還宮

魏書載冬十有一月己卯詔京洛兵蕪歲踰十紀先
皇定鼎舊都惟新魏厯剪掃遐荒創茲雲構鴻功茂
績規模長遠今廟社及建宮極斯崇便當以來月中
旬蠲吉從御仰尋遺意感慶交衷既禮盛周宣斯干
之制事高漢祖壯禮之儀可依典故備茲考古以稱
遐邇人臣之望魏書載冬十有二月戊子詔曰民本
農桑國重蠶籍染盛所憑冕織攸寄比京邑初基耕
桑暫缺遺規往昔宜必祇修今寢殿顯成移御惟始

春郊無遠拂羽有辰便可表營千畝開設宮壇東未
授筐躬勸億兆

壬寅以太極前殿初成饗羣臣賜布帛有差是歲河州
大飢死者二千餘口西域二十七國並遣使朝貢

是歲梁武帝天監元年

四年春正月乙亥親耕籍田三月己巳皇后先蠶于北
郊四月癸未朔蕭寶夤為東揚州刺史封丹陽郡公齊
王庾寅南天竺國獻辟支佛雅成成為旱故命鞠寬獄

魏書載戊戌詔曰酷吏為禍綿古同患孝婦淫刑東
海焦壤今不雨上旬意者有冤獄乎尚書鞠京師見
囚務盡聽察之理

己亥減膳徹懸辛丑澍雨大洽五月甲戌行梁州事楊
椿大破反氏六月壬午朔封皇弟悅為汝南王秋七月
乙卯三老平陽公元丕卒庚午詔復收鹽池利辛未以
彭城王勰為太師八月勿吉國貢楛矢冬十一月己未
封武興國世子楊紹先為武興王

正始元年春正月丙寅大赦改元夏五月丁未朔太傅
北海王詳以罪廢為庶人六月以旱故徹樂減膳癸巳
詔有脩案舊典祇行六事

魏書載詔曰朕政刑多舛陽旱六旬京甸枯瘁在于
之責有司可循案舊典祇行六事囹圄冤滯平處決
之庶尹廢職重加脩舉鰥寡困窮在所存恤役賦殷
煩咸加蠲省賢良正直以禮進之貪殘佞諛時加屏
黜男女怨曠務令遵會稱朕意焉

甲午帝以旱故親薦享于太廟戊戌詔立周旦夷齊廟
于首陽山庚子以旱故公卿以下引咎責躬又錄京師
見囚殊死已下皆減一等鞭杖之坐悉原之秋七月丙
子假鎮南將軍李崇大破諸蠻八月丙子假鎮南將軍
元英破梁將馬仙琕于義陽詔洛陽令有大事聽面敷
奏乙酉元英攻拔義陽辛卯英又大破梁軍仍請三關
丁酉封英為中山王九月詔諸州蠲停徭役不得橫有
徵發柔然犯塞詔左僕射源懷討之冬十月乙未詔斷

羣臣白衣募吏十一月戊午詔有司依漢魏舊章營繕
國學

魏書載詔曰古之哲王莫不崇建膠序開訓國胄昭
宣三禮崇明四術使道暢羣邦風流萬宇自皇基從
構光宅中區軍國務殷未遑經建靜言思之有慙古
烈可敕有司依漢魏舊章營建國學

十二月丙子以苑牧公田分賜代遷戶己卯詔羣臣議
定律令閏月癸卯朔行梁州事夏侯道遷居漢中來降

乙丑以高陽王雍為司空是歲高麗遣使來朝貢

二年春正月丙子封宕昌世子梁彌博為宕昌王二月梁州
氏蜀反絕漢中運路州刺史邢巒頻大破之

魏書靈徵書曰是年三月徐州蠶蛾食人厄殘者一
百十餘人死者二十二人

夏四月己未城陽王鸞薨己丑詔曰任賢明治自普通
規而中正所銓但為門第吏部彛倫乃不才舉遂使英
德罕升司務多滯不精厥選將何考陟八座可審議往

代推賢之休必令才學並申資望兼致刑鑒遣統軍王足西伐頻破梁諸軍遂入劍閣

魏書曰六月己丑詔錄先朝勲臣後隨才銓序又詔尚書李崇太府卿于忠散騎常侍游肇諫議大夫鄧羨俱為大使分斷外州畿內各守令咎失彰露者即使施決州鎮重職聽為表聞

秋七月戊子王足擊破梁軍因逼涪城八月壬寅詔中山王英南討襄沔冬十一月戊辰朔武興王楊紹先叔

父集起謀反詔光祿大夫楊椿討之王足圍涪城益州
諸郡戍降者十二三送編籍者五萬餘戶既而足引軍
退是歲鄧至國遣使朝貢

三年春正月丁卯朔皇子昌生大赦壬申梁秦二州刺
史邢巒連破氐賊剋武興秦州人王智等聚衆自號王
公尋推秦州刺史呂苟兒為主年號建明己卯楊集起
兄弟相率降二月丙辰詔求謙言戊午詔右衛將軍元
麗討呂苟兒三月己巳以戎旅興詔停諸作己卯樂良

王長命坐殺人賜死庚寅平南將軍曲江縣公陳伯之
自梁城南奔夏四月丁未詔罷鹽池禁五月丙寅詔以
時澤未降春稼已旱或有孤老餒疾無贍救因以致死
暴露溝塹者令洛陽部尉依法棺埋秋七月庚辰元麗
大破秦賊降呂苟兒及其王公三十餘人秦涇二州平
戊子中山王英大破梁徐州刺史王伯敖于陰陵己丑
詔發定冀瀛相肆六州卒十萬以濟南軍八月壬寅安
東將軍邢巒破梁將桓和于孤山諸將所在克捷兗州

平壬戌曲赦涇秦岐涼河五州九月癸酉邢巒大破梁
軍于宿豫徐州平己丑中山王英大破梁軍于淮南遂
攻鍾離冬十一月甲子帝為京兆王愉清河王懌廣平
王懷汝南王悅講孝經于武乾殿是歲高麗柔然國並
遣使朝貢

四年夏四月戊戌鍾離大水中山王英大敗而還六月
己丑朔詔有司準前式置國子立太學樹小學于四門
魏書載詔曰高祖徙縣中區光宅天邑戎繕兼興未

遣儒教朕思模聖規述遵先志可勅有司準訪前式
置國子立太學樹小學于四門

秋八月己亥中山王英齊王蕭寶貴坐鍾離敗除名辛
丑敦煌民飢詔開倉賑恤九月己未詔以徙正宮極庸
績未酬以司空高陽王雍為太尉尚書令廣陽王嘉為
司空百官悉進位一級庚申夏州長史曹明謀反伏誅
甲子開斜谷舊道丙戌司州民飢詔開倉賑恤閏月甲
午禁司馬大門不得車馬出入冬十月丁卯皇后于氏

崩乙酉葬順皇后十一月丁未自碣石至于劍閣東西
七千里置二十二郡尉十二月戊午詔兵士鍾離沒落
者復一房田租三年是歲西域東夷四十餘國並遣使
朝貢

永平元年春三月戊子皇子昌薨丙午以去年旱儉遣
使者所在賑恤夏五月辛卯帝以旱故減膳徹懸六月
壬申詔依洛陽舊圖脩聽訟觀當與王公卿士親臨錄
問秋七月甲午立夫人高氏為皇后乙未詔以諸獄官

加杖違制付尚書精檢以聞八月壬子朔日有蝕之癸
亥冀州刺史京兆王愉據州反丁卯大赦改元九月丙
戌復前中山王英本封戊戌賜太師彭城王勰死癸卯
假鎮北將軍李平剋信都擒愉送京師冀州平冬十月
丁巳詔復北海王詳本封葬以王禮豫州彭城人白早
生殺刺史司馬悅據城南叛十二月己未尚書邢巒剋
懸瓠斬早生擒梁將齊苟兒等是歲北狄東夷西域十
八國並遣使朝貢高昌國王麴嘉表求內徙

三年春正月中山王英拔梁武陽闕進攻黃峴西關皆克之涇州沙門劉慧汪聚衆反詔華州刺史奚康生討之夏四月己酉武州鎮飢詔開倉賑恤甲子詔緣邊州鎮自今一不聽寇盜境外犯者罪同境內

魏書載詔曰聖人濟世或正或權理無恒在先廟以雲駕甫遷蒿基始構河洛民庶徙內未安伊闕西南羣蠻填聚沔陽賊城連邑作戍蠹爾愚巴心未純款故暫抑造育之仁權緩肅奸之法今京師天固與昔

不同楊荆郢益悉皆我有保險諸蠻罔不歸附商洛
民情誠倍往日唯襄懋已南仁乖道政被拘隔化非
民之咎而無賴之徒輕相劫掠屠害良善離人父兄
便可放彼掠民示其大惠捨此殘賊未令之愆并勅
緣邊州鎮自今以後不聽緣邊寇盜犯者罪同境內
若州鎮諸將知容不糾坐之如律

五月辛丑帝以旱故減膳徹懸禁斷屠殺甲辰幸華林
都亭錄囚徒死罪以下降一等六月辛亥詔曰江海方

同車書宜一諸州軌轍南北不等今可申敕四方遠近
無二秋八月丙午朔日有食之戊申以鄧至國世子像
覽蹄為其國王九月辛巳封故北海王子顥為北海王
壬午詔定諸門閹名冬十月以廣陽王嘉為司徒庚午
郢州獻七寶牀詔不納

冊府元龜曰郢州刺史韓務獻七寶牀象牙白席詔
曰晉武却雉頭裘服朕嘗嘉之今務所獻亦此類也
奇麗之物有乖佩素可付其家人

冬十一月甲申詔禁屠殺含孕以為永制己丑帝于式
乾殿為諸僧朝臣講維摩詰經十二月詔五等諸侯其
同姓者出身公正六下侯從六上伯從六下子正七上
男正七下異族出身公從七上侯從七下伯正八上子
正八下男從八上清修出身公從八下侯正九上伯正
九下子從九上男從九下是歲西域東夷二十四國並
遣使朝貢

三年春二月壬子秦州沙門劉光秀謀反州郡捕斬之

癸亥秦州隴西羌殺鎮將趙儁反州軍討平之三月丙戌皇子詔生大赦夏四月平陽郡之禽昌襄陵二縣大疫自正月至此月死者二千七百三十人五月丁亥冀定二州旱儉詔開倉賑恤六月壬寅詔重求遺書于天下冬十月辛卯中山王英薨丙申詔太常立館使京畿內外疾病之徒咸令居處嚴勅醫署分師救療考其能否而行賞罰又經方浩博卒難窮究令有司集諸醫工惟簡精要取三十卷以班九服十二月辛巳江陽王繼

坐事除名甲申詔于青州立孝文皇帝廟殿中侍御史
王敞謀反伏誅是歲西域東夷北狄十六國並遣使朝
貢

四年春正月丁巳汾州劉龍駒聚衆反詔諫議大夫薛
和討之二月壬午青齊徐兖四州民飢甚遣使賑恤三
月壬戌司徒廣陵王嘉薨夏四月梁遣其鎮北將軍張
稷及馬仙琕寇朐山詔徐州刺史盧昶率衆赴之五月
己亥遷代京銅龍置天泉池西秋七月癸巳勿吉國貢

楷矢丙辰詔禁天文學冬十月朐山城陷盧昶大敗而
還十二月壬戌朔日有蝕之是歲西域東夷北狄二十
九國並遣使朝貢

延昌元年春正月乙巳以頻年水旱百姓飢餓分遣使
者開倉賑恤丙辰以尚書令高肇為司徒清河王懌為
司空三月甲午州郡十一大水詔開倉賑恤以京師穀
貴出倉粟八十萬石以賑恤貧者己未安樂王銓薨夏
四月詔以旱故斷食粟之畜丁卯詔曰遷京嵩縣年將

二紀虎聞缺唱演之音四門絕講訟之業博士端然虛
祿靜言念之有兼愧慨可嚴勅有司國之學孟冬使太
學四門明年暮春令就戊辰以旱故詔尚書與羣司鞠
理獄訟辛未詔河北民飢就穀六鎮丁丑帝以旱故減
膳徹懸癸未詔曰肆州地震陷裂死傷甚多亡者不可
復追生病宜加療救可遣太醫折傷醫并給所須藥就
療乙酉大赦改元詔立理訴殿申訟車以盡冤窮之理
五月丙午詔天下有粟之家供年之外悉貸飢民自二

月不雨至于是月己未晦日有蝕之六月壬申澍雨大
洽戊寅通河南北馬之禁庚辰詔出太倉粟五十萬石
以賑京師及州郡飢民秋八月丁亥勿吉國獻楷矢冬
十月乙亥立皇子詡為皇太子十一月丙申詔以東宮
建賜天下為父後者爵一級孝子順孫廉夫節婦旌表
門閭量給粟帛十二月己巳詔守宰為御史所彈遇赦
免者及考在中第皆代之是歲西域東夷十國並遣使
朝貢

二年春正月戊戌帝御申訟車親理寃訟二月丙辰朔
賑恤京師貧民甲戌以六鎮大飢開倉拯贍己卯進太
尉高陽王雍位太保閏月辛丑以苑牧之地賜代遷民
無田者是春民飢死者數萬口夏四月庚子以絹十五
萬疋賑河南郡飢民五月甲寅朔日有蝕之是月壽春
大水遣平東將軍奚康生等步騎數千赴之六月乙酉
青州民飢詔有司開倉賑恤甲午曲赦揚州辛亥帝御
申訟車親理寃訟是夏十三郡大水秋八月辛卯詔以

水旱飢饉百姓多陷罪辜降死已下刑九月丙辰以貴族豪門崇習奢侈詔尚書嚴立限級節其流宕冬十月詔以恒肆地震民多死傷重丐一年租賦十二月丙戌丐洛陽河陰二縣租賦乙巳詔以恒肆地震民多離災其有課丁沒盡老幼單立家無受復者各賜廩粟以接來稔是歲東夷西域十餘國並遣使朝貢

三年春二月乙未詔曰肆州秀容郡敷城縣鴈門郡平原縣自去歲四月以來山鳴地震于今不已告譴彰咎

朕甚懼焉可恤瘼寬刑以答災譴夏四月青州民飢辛巳開倉賑恤乙巳帝御申訟車親理冤訟秋八月甲申帝臨朝堂考百司而加黜陟冬十一月辛亥詔司徒高肇為大將軍平蜀大都督率十五萬步騎西伐益州丁巳幽州沙門劉僧紹聚衆反自號淨居國明法王州郡捕斬之十二月庚寅詔立明堂是歲東夷西域八國並遣使朝貢

四年春正月甲寅帝不豫丁巳崩于式乾殿時年三十

三

金石錄云魏書載宣武以太和七年生景明四年帝年二十而御射碑言年十七當以碑為據然則宣武終于延昌四年蓋三十五歲而史以為三十三誤

二月甲戌朔上謚曰宣武皇帝廟號世宗甲午葬景陵帝幼有大度喜怒不形于色雅性儉素初孝文欲觀諸子志尚大陳寶物任其所取京兆王愉等皆競取珍玩帝惟取骨如意而已孝文大奇之及庶人恂失德孝文

謂彭城王勰曰吾固疑此兒有非常志相今果然矣乃見立為儲貳雅愛經史尤精釋義每至講論終夜忘疲善風儀美容貌臨朝深嘿端嚴若神有人君之量矣

肅宗孝明皇帝諱詡宣武皇帝第二子母胡充華永平三年三月丙戌生于宣光殿之東北有光焰于庭中延昌元年十月乙亥立為皇太子四年正月丁巳宣武帝崩是夜太子即皇帝位戊午大赦己未徵下西討東防諸軍庚申詔太保高陽王雍入居西柏堂決庶政以任

城王澄為尚書令百官總已以聽二王二月庚辰尊皇后高氏為皇太后辛巳司徒高肇至京師以罪賜死癸未進太保高陽王雍為太傅領太尉以司空清河王懌為司徒以驃騎大將軍廣平王懷為司空乙亥尊胡充華為皇太妃三月甲辰朔皇太后出俗為尼徙御金墉城丙辰詔進宮臣位一級己丑詔進文武羣官位一級夏六月沙門法慶聚眾反于冀州殺阜城令自稱大乘秋八月乙亥領軍于忠矯詔殺左僕射郭祚尚書裴植

免太傅高陽王雍官以王還第丙子尊皇太妃為皇太后戊子帝朝太后于宣光殿大赦己丑進司徒清河王譚為太傅領太尉以司空廣平王懷為太保領司徒任城王澄為司空庚寅以車騎大將軍于忠為尚書令特進崔光為車騎大將軍並儀同三司壬辰復江陽王繼本國復濟南王彧先封為臨淮王羣臣奏請皇太后臨朝稱制九月乙巳皇太后親覽萬幾甲寅征西大將軍元遙破斬法慶傳首京師安定王變薨冬十月庚午朔

勿吉國貢楷矢乙酉以安定公胡國珍為中書監儀同
三司辛丑以高陽王雍為太師乙酉鎮南將軍崔亮破
梁將趙祖悅軍遂圍硤石丁卯帝皇太后謁景陵是歲
東夷西域北狄十八國並遣使朝貢

熙平元年春正月戊辰朔大赦改元荆沔都督元志大
破梁軍以吏部尚書李平為台節度討硤石諸軍三月
乙巳鎮東將軍蕭寶夤大破梁將於淮北癸亥初聽秀
才對策第中上以上叙之乙丑鎮南崔亮鎮東李平等

剋硤石斬趙祖悅傳首京師盡俘其衆三月戊辰朔日
有蝕之夏四月戊戌以瀛州民飢開倉賑恤五月丁卯
朔以炎旱明釐察獄訟權停作役庚午詔放華林野獸
于山澤秋七月庚午重申殺牛禁

冊府元龜曰是年詔遣沙門惠生使西域採諸經律
時帝于城內大社西起永寧寺太后親率百寮表基
立制佛圖九層高四十餘丈費用不可勝記

八月丙午詔古帝諸陵四面各五十步勿聽耕稼

欽定四庫全書

魏書載詔曰先賢列聖仁風盛德煥乎圖史暨厯數
永終陵隧杳藹鞠為茂草古帝諸陵多見踐踏明敕
所在諸有帝王墳陵四面各五十步勿聽耕稼

九月丁丑淮堰破梁緣淮城戍村落十餘萬口皆漂入
海是歲吐谷渾宕昌鄧至高昌陰平等國並遣使朝貢
二年春正月大赦餘賊復相聚攻瀛州刺史宇文福討
平之甲戌大赦庚寅詔遣大使巡行四方問疾苦恤孤
寡黜陟幽明二月丁未封御史中尉元匡為東平王三

月丁亥太保領司徒廣平王懷薨

魏書禮志載是月詔以太武皇帝神武纂業克清禍
亂可配南郊孝文皇帝惟新魏道刑措勝殘宜配明
堂

夏四月丁酉詔京尹所統年高者板賜郡各有差戊申
以開府儀同三司胡國珍為司徒乙卯皇太后幸伊闕
石窟寺即日還宮改封安定王超為北平王五月

魏書詔曰揚硤石荆山新淮郡城兵士戰沒者追給

欽財復一房五年若無妻子復其家人二年身被三瘡賞一階雖一瘡而四體廢落者一同此賞

庚辰重申天文禁犯者以大辟論秋七月乙亥儀同三司汝南王悅坐殺人免官以王還第己巳享太廟八月戊戌宴道武以己宗室年十五以上于顯陽殿申家人禮

冊府元龜載詔曰皇魏開基帝胤繁衍親賢並茂而猶沈屈素里曲褐衡門何以翼屏王室今可依世近

序之列位

己亥詔庶族子弟年未十五不聽入仕庚子詔咸陽京兆二王子女還附屬籍

冊府元龜載詔曰周德崇厚蔡仲享國漢道仁恕淮南畢王皆所以申恩赦威蠲滯舊釁義彰曩策詠流前史咸陽京兆兩門諸子並可聽附屬籍

丁未詔太師高陽王雍入居門下參決尚書奏事丙寅詔自今月望當出城闔親納滯枉冬十月以幽翼滄瀛

光五州飢遣使巡撫開倉賑恤丁酉年呂國貢楷矢
魏書載乙卯詔曰北京根舊帝業所基南遷二紀猶
有畱住懷本樂故未能自遣若未遷者悉可聽其仍
停安堵永業門才術藝應于時求者自別徵引不在
斯例周之子孫漢之列族徧于海內豈拘南北千里
而已哉魏書靈徵志載十一月己未并州表送祁縣
民韓僧真女令姬從母右脇生胡太后詔付掖庭
是歲東夷西域氏羌等十一國並遣使朝貢

神龜元年春正月甲子詔以氏酋楊定為陰平王壬申
詔給京畿老人板郡縣各有差及賜鰥寡孤獨粟帛庚
辰詔以雜役戶或冒入清流所在職人皆令五人相保
無人任保者奪官還役乙酉秦州羌反幽州大飢死者
三千七百九十人詔刺史開倉賑恤二月己酉詔以神
龜表瑞大赦改元東益州氏反三月南秦州氏反夏四
月丁酉司徒胡國珍薨甲辰改封江陽王繼為京兆王
六月自正月不雨是月辛卯澍雨乃降秋七月河州人

欽定四庫全書

卷九十

却鐵忽聚衆反自稱水池王閏月甲辰開恒州銀山禁
八月癸丑朔詔京師見囚殊死以下悉減一等

魏書載丁巳詔曰頃年以來戎車頻動服制未終奪
哀從役罔極之痛弗申鞠育之恩靡報非所謂敦崇
至道者也自今雖金革之事皆不得請起居喪

甲子却鐵忽詣行臺源之恭降九月戊申皇太后弒故
皇太后高氏于瑤光寺冬十月丁卯以尼禮葬芒山中
二月辛未詔曰民生有終下歸兆域京邑隱賑口盈億

萬貴賤攸憑未有定所今制乾脯山以西擬為九原是
歲東夷西域北狄十一國並遣使朝貢

二年春正月辛巳朔日有蝕之丁亥詔曰皇太后撝謙
自居稱號弗備宜遵舊典稱詔字內以副元元之望是
月改葬文昭皇太后高氏

魏書禮儀志載胡太后與服總既葬而除

二月乙丑齊郡王祐薨庚午羽林千餘人焚征西將軍
張彘第毆傷彘焚殺其子均乙亥大赦丁丑詔求直言

壬寅詔以旱故命依舊寧祈禱理冤獄掩骼埋骸賑窮恤寡三月甲辰澍雨大洽夏五月戊戌以司空任城王澄為司徒京兆王繼為司空秋八月乙未御史中尉東平王匡坐事削除宮爵九月庚寅皇太后幸嵩高山癸巳還宮冬十二月癸丑司徒任城王澄薨庚申大赦詔除淫祀焚諸雜神是歲吐谷渾宕昌嚙唃等國並遣使朝貢

正光元年春正月乙亥朔日有蝕之

魏書載乙酉詔曰建國緯立教為本來歲仲陽節和
氣潤釋奠孔顏此其時也有司可豫繕國學圖飾聖
賢置官簡牲擇吉備禮

夏四月丙辰詔尚書長孫承業巡撫北蕃觀察風俗五
月辛巳以炎旱故詔八座鞠見囚申枉濫

魏書曰癸未詔刺史守令撫恤窮寃理決庶獄其賦
役不便于民者具以狀聞

秋七月丙子侍中元乂中常侍劉騰奉帝幸前殿矯皇

太后詔歸政遜位

魏書載詔曰我高祖孝文皇帝世宗宣武皇帝鴻勳未半俱早登遐車書弗同寇盜尚熾幼主稚弱風纂寶厯朕敬順羣請臨朝總政帝年已長久思退身所往歲殷勤具陳情旨而僉爾衆意苦見勤奪詎俛從事以迄于茲自此春耒先疾屢發夏首及今數加動劇便不堪日釐萬務巨細兼省帝齒周星紀識學逾躋足以撫輯萬邦朕當率前志敬遜別宮遠惟復子

明辟之義以自綏養實望羣公逮于黎庶深鑒斯理
乃幽皇太后北宮殺大傅清河王懌總勒禁放決事殿
中辛卯帝加元服大赦改元內外百官進位一等八月
甲寅相州刺史中山王熙舉兵欲討乂騰不果見殺九
月壬辰柔然主阿那瓌來奔戊戌以太師高陽王雍為
丞相冬十月乙卯以儀同三司汝南王悅為太尉十一
月己巳詔封阿那瓌為朔方郡公柔然王十二月壬子
詔送柔然王阿那瓌歸國如不容受任聽送闕辛酉以

司空京兆王繼為司徒

洛陽迦藍記曰是歲沙門惠生自西域還得梵經論
一百七十部梁普通元年

二年春正月南秦州氐反二月車駕幸國子學講孝經
三月庚子幸國子學祠孔子以顏回配甲午右衛將軍
奚康生于禁中殺元人不果為人所害以儀同三司劉
騰為司空夏四月庚子進司徒京兆王繼為太保壬寅
以儀同三司崔光為司徒五月丁酉朔日有蝕之秋七

月己丑以旱故詔有司脩案舊典祇行大事

魏書載六事云決園枉脩廢職恤困窮蠲賦役進賢
良黜貪邪偶怨曠

八月己巳柔然後主郁久間侯匿伐來奔懷朔鎮十二
月甲戌詔司徒崔光安豐王延明等議定服章庚辰以
東益南秦州氏反詔河間王琛討之失利是歲焉耆居
塞波期高昌勿吉伏羅高車等國並遣使朝貢

三年春正月辛丑帝耕籍田夏四月庚寅以高車國王

覆伊訇為鎮西將軍西海郡公高車國王五月壬辰朔
日有蝕之六月己巳以旱故詔分遣有司馳祈嶽瀆及
諸山川百神能興雲雨者命理冤獄止土功減膳徹懸
禁止屠殺冬十一月己丑朔日有蝕之乙巳祀圓丘丙
午詔班厯大赦十二月癸酉以太保京兆王繼為太傅
司徒崔光為太保是歲波期不溪龜茲吐谷渾並遣使
朝貢

四年春二月壬申追封故咸陽王禧為敷城王京兆王

愉為臨洮王清河王懌為范陽王以禮加葬丁丑河間
王琛章武王融並以貪汙削爵除名己卯柔然阿那瓌
率衆犯塞遣尚書左丞元孚為北道行臺持節喻之柔
然後主郁久閭侯匱伐來朝司空劉騰卒夏四月阿那
瓌執元孚北遁秋

魏書載秋七月辛亥詔曰崇敬黃耆先代通訓故方
叔以元老處位充國以自強見留雖七十致仕明乎
典故然以德尚壯許其繫維令庶僚之中或年更懸

車循禮宜退但少收其功棄其身言念勸舊惓然未忍或戴白在野未當外任或停私厯紀甫受考級如此之徒雖滿七十聽其莅民以終常限或新解郡縣或外任始停已滿七十方求更叙者吏部可依今不奏其有高名俊德老成髦士灼然顯達者不拘斯例若才非秀異見在朝官依令合解者可給本官半祿以終其身使辭朝之叟不恨歸于閭巷矣

八月癸未追復故范陽王懌為河間王九月丁酉詔太

尉汝南王悅入居門下與丞相高陽王雍參決尚書奏
事冬十一月癸未朔日有蝕之丙申趙郡王謚薨丁酉
太保崔光卒十二月以太尉汝南王悅為太保徐州刺
史北海王顓生貪汙削爵除官是歲宕昌庫莫奚國並
遣使朝貢

五年春正月辛丑帝祀南郊三月沃野鎮人破六韓拔
陵反聚眾殺鎮將號真王元年夏四月高平酋長胡琛
反自稱高平王攻鎮以應拔陵別將盧祖遷擊破之五

月都督北征諸將事臨淮王或討拔陵敗于五原削除
官爵壬申詔尚書令李崇為大都督率廣陽王琛等北
討六月秦州城人莫折大提據城反自稱秦王殺刺史
李彥大提尋死子念生代立僭稱天子年號天建置立
百官丁酉大赦秋七月甲寅詔吏部尚書元脩義為西
道行臺率諸將西討戊午復河間王琛臨淮王或本封
是月涼州幢帥于菩提呼延雄執刺史宋穎據州反念
生遣其兄高陽王天生下隴東寇八月甲午雍州刺史

元志西討大敗于隴東退守岐州丙申詔諸州鎮軍元
非犯配者悉免為編戶改鎮為州依舊立稱

魏書載丙申詔曰賞貴宿勞明主恒德太祖道武皇
帝世祖太武皇帝躬率六師掃清蕪穢諸州鎮城人
本充牙爪服勤征旅逮顯祖獻文皇帝自北被南淮
海思入便差割疆族分衛方鎮高祖孝文皇帝將遷
伊洛規過北疆蕩闢南境選良家苗貊增戍朔垂戎
捍所寄實惟斯等先帝以其成效既亮方加酬錫會

宛郢馳烽朐泗告警兵連積歲茲恩仍寢怨叛之興
頗由于此朕叨承乾厯思廣惠滌宜追述前恩敷茲
後施諸州鎮軍貫元非犯配者悉免為民鎮改為州
依舊立稱此等世習干戈率多勁勇今既甄拔應思
報効可三五簡發討彼沙隴妖黨狂醜必可蕩滌衝
鋒斬級自依恒賞

九月壬申詔尚書左僕射齊王蕭寶寅為西道行臺大
都督復撫軍北海王顯官爵為都督並率諸將西討乙

亥帝幸明堂餞寶賁等吐谷渾主伏連等遣兵討涼州
于菩提走追斬之城人趙天安復推宋穎為刺史冬十
月營州城人劉安定執德興據城反執刺史李仲遵城
人王惡兒斬安定以降德興東走自號燕王十二月詔
太傅京兆王繼為太師大將軍率諸將西討莫折念生
汾州正平平陽胡叛逆詔復征東將軍章武王融封爵
為大都督率衆討之莫折念生遣兵攻涼州城人趙天
安復執刺史以應之是歲嘽嗟契丹地豆千庫莫奚等

國並遣使朝貢

孝昌元年春正月庚申徐州刺史元法僧據城反自稱
宋王年號天啟遣其子景仲歸梁梁遣其將豫章王綜
入守彭城法僧擁其寮屬南入詔臨淮王彧尚書李憲
為都督安豐王延明為東道行臺俱討徐州癸亥蕭寶
夤及征西將軍崔延伯大破賊于黑水天生退走入隴
涇岐及隴悉平以太師大將軍京兆王繼為太尉二月
以鎮軍將軍元乂為驃騎大將軍儀同三司詔追復故

樂良王長命爵以其子忠紹之戊戌大赦三月甲戌詔
五品以上各荐所知夏四月辛卯皇太后復臨朝攝政
引羣臣面陳得失

魏書載詔曰朕以寡昧夙承天厯神龜之末權臣擅
命元人劉騰陰相影響遂使皇太后幽隔後宮太傅
清河王無辜致害相州刺史中山王熙橫被夷滅右
衛將軍奚康生仍見誅剪從此已後無可畏忌無君
不臣緣事彌彰蔽耳目之明專生殺之柄此而可忍

孰不可懷雖屢經赦宥未容致之于法猶宜辨正以
謝朝野騰身既往可追削爵位又之罪狀誠合徽纒
但以宗枝舊戚特加全貸可除名為民

壬辰征西將軍都督崔延伯大敗于涇川戰歿六月癸
未大赦改元柔然王阿那瓌大破拔陵是夜諸將逼彭
城蕭綜夜潛出降梁諸將奔退衆軍追躡免者十二三
秋八月癸酉詔斷遠近貢獻珍麗違者免官柔玄鎮人
杜洛周反于上谷年號真王九月乙卯詔減天下租賦

之半

魏書載辛酉詔曰追功表德為善者勸祖宗功臣勒
銘王府而子孫廢替淪于凡民爵位無聞遷流有失
潁川名守重泉令宰惠風善政結于民心而猶同常
品未蒙褒陟非所謂愛及甘棠爰倫攸叙者也其功
臣名將為先朝所知子孫屈塞不見齒叙牧守令長
聲稱卓然者皆仰有司具以名聞朕將振彼幽滯用

閏治風

壬戌詔五品以上各舉所知辛未曲赦南北秦州冬十月柔然遣使朝貢十一月辛亥詔父母年八十以上者皆聽居官祿養時四方多事諸蠻復反十二月壬午下詔親征山胡劉蠡升反自稱天子

二年春正月庚戌封廣平王懷庶長子誨為范陽王壬子以太保汝南王悅領太尉是月五原鮮于修禮反于定州年號魯興詔左光祿大夫長孫稚為大都督與都督河間王琛北討二月庚申帝及皇太后臨大夏門親

覽寃訟三月庚子追復中山王熙本爵以其子叔仁紹
之夏四月大赦戊申北討都督河間王琛長孫承業失
利奔還詔並免官爵五月丁未車駕將北討內外戒嚴
前給事黃門侍郎元畧自梁還朝封義陽王以丞相高
陽王雍為大司馬廣陽王淵為大都督率都督章武王
融北討修禮六月己巳曲赦齊州絳蜀陳雙熾聚眾反
自號始建王曲赦平陽建興正平三郡詔假鎮西將軍
都督長孫承業討雙熾平之丙子改封義陽王畧為東

平王戊寅詔復京兆王繼本封江陽王戊子詔曰自運
屬艱棘歷載于茲

冊府元龜載詔有云烽驛交馳征鼓不息祖宗盛業
危若綴旒

朕威德不能遐被經畧無以及遠何以苟安黃屋無愧
黔黎今便避居正殿蔬飧素服當親自招募冀集忠勇
其有直言正諫之士敢決徇義之夫二十五日悉集華
林東門人別引見共論得失秋八月丙子進封廣川縣

公元卽為常山王戊寅帝幸南石窟寺即日還宮戊子
進武城縣公子攸為長樂王癸巳賊帥元洪業斬鮮于
修禮請降為賊黨葛榮所殺都督爾朱榮執肆州刺史
尉慶賓令其從叔羽生統州軍九月辛亥葛榮敗都督
廣陽王琛章武王融于博野白牛邏融歿于陣榮自稱
天子國號齊年稱廣安冬十一月戊戌杜洛周攻陷幽
州執刺史王延年及行臺常景丙午稅京師田租畝五
升借賃公田者畝一斗閏月稅市人出入者各一錢店

舍為五等梁將元樹逼壽春揚州刺史李憲力屈而降
初留州縣及長史司馬戍主副質子于京師詔宗室子
女屬籍在七廟內為雜戶濫門拘辱者悉聽離絕是歲
疊伏羅庫國並遣使朝貢

三年春正月甲戌以司空皇甫度為司徒儀同三司蕭
寶夤為司空辛巳葛榮陷殷州刺史崔楷死之甲申詔
峻鑄錢之制蕭寶夤大敗于涇州北海王顥亦敗走曲
赦關西及正平平陽建興戊子以司徒皇甫度為太尉

己丑以四方未平詔內外戒嚴將親征二月丁酉詔開
輸賞格輸粟入瀛定岐雍四州者官斗二百斛賞一階
入二華州者五百石賞一階不限多少粟畢授官鹵賊
據潼關丁未追復故東平王匡爵改封濟南王三月甲
子詔將西討中外戒嚴鹵賊走復潼關戊辰詔金紫光
祿大夫源子邕為大都督討葛榮秋七月相州刺史安
樂王鑒據州反己丑大赦八月都督源子邕李神軌裴
衍攻鄴丁未斬鑒相州平九月己未東豫州刺史元慶

和以城南叛秦州城人杜梁殺莫折念生自行州事冬
十月戊申曲赦恒農巴西河北正平平陽鄆郡及關西
諸州軍辛亥以衛將軍討鹵大都督爾朱榮為車騎將
軍儀同三司甲寅齊雍州刺史蕭寶夤據州反自號齊
年稱隆緒詔尚書左僕射長孫稚討之十一月己丑葛
榮攻陷冀州執刺史元孚逐出居人凍死者十六七十
二月戊申都督源子邕裴衍與榮戰敗于陽平東北並
沒

伽藍記曰京師平等金像一軀常有神驗國之吉凶
先炳祥異孝昌三年十二月中此像面有悲容兩目
垂淚徧體皆濕時號佛汗有比丘尼拭以淨綿須臾
濕盡更易以他綿俄復濕三日乃止明年爾朱榮起
兵百官死亡塗地

是月杜粲為駱超所殺遣使歸罪是歲柔然遣使朝貢
是歲梁大通元年

武泰元年春正月乙丑生皇女秘言皇子丙寅大赦改

元丙子長孫稚平潼關丁丑雍州人侯終德相率攻蕭
寶黃寶黃度渭走雍州平二月癸丑皇太后弒帝帝崩
于顯陽殿時年十九甲寅皇子即位大赦皇太后詔曰
皇家握厯受圖年將二百高祖以文思先天世宗以下
武繼世大行在御溫明恭順率望穹靈降祐麟趾衆繁
自潘充華有孕椒宮冀誕儲兩而熊羆無兆唯虺逐彰
時以國步未康假稱統胤欲底定國情何圖一旦弓劍
莫追皇曾孫故臨洮王寶暉世子釗體自高祖大行平

日養愛特深及翊日弗愈大漸靡留乃延入青蒲受命
玉几允應大寶即日踐阼可班宣遠邇咸使知之乙卯
幼主即位儀同三司大都督爾朱榮抗表請入奔赴勒
兵而南是月杜洛周為葛榮所并三月甲申上謚曰孝
明皇帝乙酉葬定陵廟號肅宗四月戊戌爾朱榮濟河
庚子沉皇太后并幼主于河

論曰宣武承聖考德業天下想望風化垂拱無為邊徼
稽服而寬以攝下從容不斷太和之風替矣比之漢世

安順宣武之後繼以元成孝明冲齡統業靈后婦人專制任用非人賞罰乖舛于是釁起宇內禍延邦畿卒享國不長抑亦淪胥之始也

南北史合注卷九十